

**Agong, PM Singapura Hargai Hubungan Erat Terjalin Antara Malaysia, Singapura  
Bernama  
Mei 20, 2014**

SINGAPURA, 20 Mei (Bernama) -- Yang di-Pertuan Agong Tuanku Abdul Halim Mu'adzam Shah dan Perdana Menteri Singapura Lee Hsien Loong menzahirkan penghargaan terhadap hubungan erat yang terjalin sejak sekian lama antara Singapura dan Malaysia.

Tuanku Abdul Halim dan Lee juga menegaskan tentang pentingnya memperkukuh kerjasama dua hala dan memperkasa hubungan rakyat dengan rakyat kedua-dua negara.

Dalam satu kenyataan, Kementerian Hal Ehwal Luar Singapura berkata penghargaan itu dizahirkan semasa kunjungan hormat di sini hari ini.

Lee dan isteri menghadap Tuanku Abdul Halim dan Raja Permaisuri Agong Tuanku Hajah Haminah hari ini.

Hari ini merupakan hari kedua lawatan negara oleh Yang di-Pertuan Agong dan Raja Permaisuri Agong selama tiga hari ke Singapura.

Pasangan diraja itu memulakan atur cara hari ini dengan melawat Taman Orkid Nasional dengan diiringi oleh Wanita Pertama Singapura, Puan Mary Tan.

Bersempena dengan lawatan negara, sejenis spesies Orkid diberi nama "Aranda Abdul Halim Mu'adzam Shah" sempena nama baginda. Ini diikuti dengan lawatan pasangan diraja itu ke Gardens by the Bay.

Esok, Presiden Singapura Dr Tony Tan Keng Yam dan isteri akan menjadi hos dan mengiringi Seri Paduka berdua dalam lawatan ke Istana, yang pertama bagi ketua negara yang melakukan lawatan.

Presiden dan isteri akan menjadi hos pada majlis jamuan teh tidak formal bagi pasangan diraja itu selepas lawatan.

Tuanku Abdul Halim dan Tuanku Hajah Haminah juga akan melawat Reflections di Bukit Chandu sempena memperingati Pertempuran Pasir Panjang semasa serangan tentera Jepun terhadap Singapura semasa Perang Dunia Kedua.

Ini diikuti dengan lawatan ke Night Safari bagi mengakhiri lawatan negara oleh Seri Paduka berdua.

Tuanku Abdul Halim dan Tuanku Hajah Haminah akan berangkat pulang ke tanah air pada Khamis.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1039802>